

Pagpanaw Diha Sa Dalan Sa Saad

KATUYOAN: Sa pagpakita sa pagkamatimuman sa Dios ug sa pagpahayag nga adunay ganti sa mga matinoohan sa Dios.

Imo bang ginatuman kanunay ang mga saad nga imong gihimo? Tingali wala, apan ang Dios magatuman gayud kanunay sa iyang mga saad. Adunay usa ka butang nga dili Niya mahimo. Siya dili makahimo sa pagpamakak. Tingali molabay una ang gatusan ka mga katuigan sa dili pa matuman ang saad, apan kon ang Dios nagsulti niini, kini moabut gayud. Mga Hebreohanon 6:13-18.

Hinumdumi nga sa sinugdanan niining *DALAN SA KINABUHI* ang Dios naghimo ug saad ngadto kang Adam ug Eva. Genesis 3:15. Ang Dios nagsulti nga moabut ang adlaw nga Siya magapadala ug Mananaug nga magabuntog ni Satanas. Apan unsa may mahimo sa Dios karon? Ang kaliwatan sa katawhan nagpatuyang sa pagpakasala ug walay diosnon nga kaliwat nga magamit sa Dios aron sa pagtuman sa iyang saad. Si Satanas hinoon mao ang mora'g nagmadagun. Molika kita sa wala ug sa **ESKINA SA KALIBOG** ug atong susihon kon unsa ang nanghitabo. Tan-awa ang mapa.

Ang Dios mitan-aw sa kaliwatan ug nagpili ug usa ka tawo nga ginganlan, ug Abram. Pinaagi kaniya pagatumanon sa Dios ang iyang saad.

a) Si Abram usa ka pagano nga nagasimba sa diosdios, sa diha nga ang Dios nakigsulti kaniya didto sa Ur sa Chaldaea.

b) Si Abram mitoo sa Dios ug kadto giisip kaniya nga maoy pagkatarung. Roma 4:3.

c) Ang Dios nagsaad nga diha kang Abram pagabuhaton ang usa ka daku nga nasud, ug siya makabaton ug usa ka daku nga ngalan, ug pinaagi kaniya pagapanalanginan ang tibuk yuta. Genesis 12:1-3.

d) Ang Dios nagsaad nga si Abram makabaton ug usa ka anak. Genesis 15:2-6.

Sa pagsunod sa tawag sa Dios si Abram miadto sa yuta sa Canaan. Genesis 12:5. Nanglabay ang mga katuigan ug si Abraham (ngalan giusab—Genesis 17:4,5) ug si Sarai nangatigulang biasa lisud na nga makabaton pa sila ug usa ka anak. Apan ang Dios wala mahikalimot sa iyang gisaad kang Abraham ug human sa 25 ka tuig nga pagpaabut ang gisaad nga anak, si Isaac, natawo. Gidugay sa Dios ang pagtuman sa iyang gisaad aron kining anak mahimong usa ka katingalahan. Ang Dios nagsulay usab sa pagtoo ni Abraham ug atong nasayran nga si Abraham nakabanug sa maong pagsulay tungod kay atong mabasa sa Roma 4:20 nga si Abraham wala magmaduhaduhaon sa saad sa Dios.

Si Isaac mitubo ug nahimong usa ka buotan nga anak. Apan miabut ang adlaw diin ang Dios nagahatag kang Abraham sa usa ka labing daku nga pagsulay. Tungod kay ang Dios buot mahibalo kon si Abraham nahigugma ba sa Dios labaw pa kay sa iyang kaugalingon nga anak. Genesis 22:12.

Ang Dios nagsulti kang Abraham ug miingon: "Kuhaon mo karon ang imong

anak..." Genesis 22:2. Kini maoy usa ka labing malisud nga pagsulay apan ang Biblia nagsulti kanato nga si Abraham nahinumdom sa saad sa Dios nga ang Dios magapanalangin sa kalibutan pinaagi sa iyang kaliwat ug siya nasayud nga ang Dios makahimo sa pagbuhi ni Isaac bisan kon siya mamatay. Mga Hebreohanon 11:19: Gituy-od ni Abraham ang iyang kamot ug gikuha niya ang iyang punyal sa pagpatay sa iyang anak. Ug niadtong higayona ang manulonda ni Jehovah misinggit kaniya gikan sa mga langit nga nagaingon: "Abraham, Abraham, dili mo pagbakyawon ang imong kamot batok sa bata...ug karon naila Ko nga ikaw nahadlok sa Dios." Genesis 22:10-12

Unya giyahat ni Abraham ang iyang mga mata ug mitan-aw; ug ania karon, ang usa ka camero nga lake sa likod, kansang mga sungay nagapus sa kasampinitan. Ug miadto si Abraham ug gikuha niya ang camero nga lake ug kini gihalad niya sa halad-nga-sinunog salili sa iyang anak. Genesis 22:13. Ug gihinganlan ni Abraham kadtong dapita nga Jehovah-Jereh; nagkahulogan: "Ang Dios maoy magahatag."

Malisud ba ang pagsulay nga gihatag sa Dios ngadto kang Abraham? Oo, malisud, apan pinaagi niini ang Dios nagpakita kanato ug duha ka mga matahum nga kamatuoran:

a) Siya naghatag kanato sa hulagway sa iyang kaugalingong dakung gugma alang kanato pinaagi sa paghatag sa iyang bugtong Anak, ang Ginoong Jesu-Cristo, aron sa pagpakamatay sa krus alang sa atong mga sala. Si Isaac naghulagway sa pagkabanhaw ni Cristo gikan sa mga patay. Si Isaac nagmasinugtanon sa kabubut-on sa iyang amahan sa diha nga si Abraham nagadala kaniya didto sa bukid arong ighahalad siya ibabaw sa halaran. Si Cristo usab nagmasinugtanon bisan hangtud sa kamatayon aron sa pagbayad sa silot sa sala. Siya mao ang nahimong kamero nga ighahalad, ang halad-alang-sa-sala ngadto sa Dios.

b) Ang Dios nagpamatuod kanato sa iyang pagkamatumanon sa pagtuman sa iyang mga saad. Ang pagsulay ni Abraham gihatag alang sa atong pagtuon. Roma 4:16-25. Pinaagi sa atong pagtoo, madawat nato ang pakamatarung. Roma 4:5. Kinahanglan nga magatoo kita nga si Cristo namatay alang sa atong mga sala ug nga Siya nabanhaw. Roma 4:24. Ang atong mga binuhatan nagpamatuod sa atong pagtoo.

Maingon nga si Abraham nakadawat ug dagkung mga ganit ug dugang pa nga mga saad human sa iyang pagdaug sa pagsulay—Genesis 22:15-18, kita usab makadawat sa tanang mga butang nga gisaad diha kang Cristo kon kita magadawat kaniya ug magatoo sa Dios. Roma 8:26-39. Ang Dios mao ang magahatag sa tanan natong gikinahanglan.

Sa sunod nga pagtuon-an motambong kita sa kasal diha sa DALAN SA SAAD. Magaampo kita nga ang Dios magalig-on sa atong pagtoo ug nga kita magabarug nga malig-on diha sa tanan Niyang mga saad.

SAG-ULOHON : Roma 4:20-21. "Diha kaniya wala ang kakulang sa pagtoo nga arang makapahimo kaniya nga maduhaduha-on sa saad sa Dios, hinonoa sa naghimaya siya nga malig-on sa iyang pagtoo, masaligon sa hingpit nga ang Dios arang makatuman sa iyang gisaad."

PAGTULON-AN 6 - PAGATUBAGON

1. Isulat sa blanko ang mga sumpay nga pulong nga nasulat diha sa dibuho.
 - a. Dalan sa _____
 - b. Dalan sa _____
 - c. Eskina sa _____

L U N O P

 - d. Tanaman sa _____
 - e. Sakyanan sa _____

2. Human sa *Tore sa Babel* ang Dios nagtawag kang _____ sa pagsugod sa bag-o nga katuyoan. Genesis 12:1.

3. Ang Dios nagsaad ug 7 ka mga butang kang Abraham. Basaha ang Genesis 12:1-3 ug isulat kon unsa kini sila:
 - a. Ug Akong pagabuhaton ang _____ nasud.
 - b. Ug ikaw _____ Ko.
 - c. Ug _____ ngalan.
 - d. Ug mahimo _____ panalangin.
 - e. Ug pagapanalanginan Ko ang mga _____ kanimo.
 - f. Ug ang mga magapanghimaraut kanimo _____ Ko.
 - g. Ug diha kanimo _____ ang tanan _____ sa yuta.

4. Ug mitco si Abraham kang Jehova _____ Genesis 15:6.

5. Ang Dios nagsugo ni Abraham nga kuhaon ang iyang _____ ug ihalad nga _____ didto sa usa sa mga bukid nga Akong igaingon kanimo. Genesis 22:2.

6. Iyang giisip nga ang Dios arang _____ ni Isaac gikan sa mga patay. Mya Hebreohanon 11:19.

7. Si Isaac naghulagway sa _____ nga gihatag sa Dios. Juan 3:16.

8. Si Abraham naghulagway sa _____ nga Amahan. Juan 3:16.

9. Ang Dios naghatag kanato sa daghan nga mga saad. Isulat sa blanko ang duha ka mga saad Niya:
 - a. Mga Buhat 16:31 - Turmoo ka sa Ginoong Jesu-Cristo ug _____
 - b. Mga Taga-Filipos 4:19 - Ug ang tanan ninyong _____ igahatag kaninyo sa akong Dios _____

10. Isulat nga sinag-ulo ang Roma 4:20-21 _____

